

四庫全書

集部

欽定四庫全書

集部

滴水集卷十三  
四

詳校官庶吉士臣吳烜

侍讀臣孫球覆勘

謄錄舉人臣楊焄  
謄錄舉人臣秦懋

欽定四庫全書

潘水集卷十三

宋 李復 撰

五言律詩

過萬泉縣

邑屋連山麓蕭條去路斜  
田無美井旱港足飛沙  
逃室多歌棟殘林有斷槎  
荒墟人不見墻角自開花

自壽安之長水

夜宿錦屏下曉行伊水長  
露寒荷葉紫秋晚稻花香  
女

几仙風斷連昌輦路荒二年渾作客山驛過重陽

白沙驛

在歸州東  
江南岸

轉側下層巔江流出斷壩寒雲生古戍野店引山泉雨  
暗疎茅濕堂危倒石懸去程無限險心落渭城邊

再過方山驛

春過方山驛依然柳色新昔遊嘗弭節舊記已埋塵往  
歲讎書客新恩守土臣南來心不競時羨北歸人

自吳嶽歸

鳴鳳岡邊路，秋風動夕嵐。  
閒雲依絕壁，獨鳥下空潭。  
曩昔經行慣，重來委曲諳。  
試尋遺墨在，投策訪僧龕。

聖容寺

僧伽舊居柳  
公權書碑

應感雖無地，棲真自有緣。  
寶坊開泗水，香露散秦川。  
草亂遺庵廢，珠明舊相圓。  
豐碑傳異事，細字刻誠懸。

遊寶雨寺

信步出江艚，庭松立兩龍。  
晨僧自汲水，高閣忽鳴鐘。  
淨飯多山蜜，新羹供野葑。  
傳聞初祖錫，猶掛最西峯。

重遊寶雨寺

題墨暗頽垣崢嶸歲序遷  
舊僧霜髮滿老柏瘦根穿  
客少庭多草村饑供乏錢  
重來猶晚暑清盥挹寒泉

興慈寺觀君俞舊題

松院前年到同君共五人  
今來觀舊蹟君已是前身  
遽掩千秋夜空傷兩歲春  
向風無可語淚灑壁間塵

峽州渡江入寺

雪暗離秦地春歸入楚邦  
平生憐匹馬將老渡長江  
解

纜辭亭樹中流見寺窗舟人喜風色畧得寸心降

江上招提古蕭疎對郡城延賓竹榻靜過雨石堂清齋  
接荊州供題多蜀士名老僧飛錫倦歸坐聽江聲

興德寺逢張居士

掃葉開新徑携餅汲曉泉偶逢巖下客來問室中禪鳥  
去空還寂薪窮火自傳四方行已徧歸老舊林邊

登青龍寺

疎爽巖邊寺秋登更晚晴連岡橫野斷遠水隔林明廢

井餘荒蹙殘碑有舊名幾經兵火劫禾黍徧新耕

遊觀音院

唐趙州  
禪師舊遊

秋林晴簇簇野竹靜娟娟臺殿橫高絕山河滿大千莫  
論金屑貴且契布毛緣試問庭前柏干戈動幾年

愍禪師

湘南衡岳水分得一支來宴坐秋峯靜澄心夜月開清  
風生虎錫驚電護龍杯昨夜飛香動山神禮寶臺

新羅寺唐有新羅僧呪草愈疾卯塔今在閒來

因題

斷石傳遺事唐年刻永徽庭荒靈草盡塔壞禮僧稀古  
殿含涼氣空堂照夕暉獨來人不問行聽暮鐘歸

甘羅廟

縱橫爭擅勢之子獨尊秦弱齒能專國竒謀不借人拳  
峰凌九仞勺粒動千鈞過客瞻遺構臨溪野草春

九日過介之推廟

荒祠久零落秋日故山阿椒菊持新奠龍蛇憶舊歌論

功嗟晉粟流怨動汾波千歲遺靈在鄉民禁火多

清明日北園亭作

錦亂筠遺籜青浮水結衣乳鳩呼却逐鬪雀墮還飛客  
過殘樽在年侵冷食稀去年今日意渡峽雨霏霏

春日北園早起

雨斷雲猶在風回氣已明林花含宿潤露沼散餘清喜  
靜心常澹居閒意寡營流光隨轉盼所向達吾生

秋晚北園

野興乘俄頃，扶行錦竹長。  
碎蔬殘宿圃，亂葉散寒塘。  
地僻柴門靜，人稀草徑荒。  
曉霜今幾見，猶有菊花黃。

晨起東軒

影暗纔分竹，煙低正滿簷。  
雨斜侵藥裏，風過亂書籤。  
篆滅香猶在，塵昏硯未添。  
靜中時有興，著論不為潛。

曉至西郊

墟落隋城外，西郊路可尋。  
帶霜殘黍短，過雨舊溪深。  
近港來迎犬，荒籬散宿禽。  
隣翁邀具餉，煙火動疎林。

江海叔邀遊吳氏園為約月餘始能一往吳生  
某求留題遂書石上

竹屋橫虛舫松屏展翠帆柳條晴後弱花態曉來嚴樂  
意難逢暇清游久嘆淹主人求客語乘醉寫雲巖

出村

風露已淒淒郊原百草腓負樵山木下轉粟戍人歸野  
曠羊牛遠場荒鳥雀稀南山經月雨猶有亂雲飛

西溪酬孫倚李珪二同年依韻

水部張員外中書白舍人曾聞三絕句同賞曲江春且  
逐追隨舊休悲老大身花今千樹發有底不來因

病起

病起秋將晚高林葉半黃梳驚殘髮少瘦覺舊衣長尚  
怯扶藜杖猶勤檢藥囊喜拋烏帽去曝背卧朝陽

雲巖

徑轉隨高下歌危亂石中寒巖朝起霧空谷夜生風疎  
竹連殘屋驚磨逐斷蓬求棲問茅舍非淺愛田翁

夜意

山霧連城白虛庭待月生  
雨餘秋葉潤露重葛衣輕  
陰壁鳴蟲澀風枝宿鳥驚  
淹留未忝興悵望故園情

和楚倅懷歸

雨斷他鄉夢風沉故國音  
山城黃葉落蘭畹白雲深  
寄食衣裘敝憑馮鞍歲月侵  
流塵昏斗劍萬里愧初心

留客

秋堂留曉客密雨擁柴門  
石鼎燃松葉山樽捧竹根  
買

魚催網急嘗粟破歟繁村黑歸泥滑移床醉夜軒

送客至黎城

二年三送客空復往來情野色浩無主秋風暮獨行山  
連長狄國水過鄴王城試問式微詠猶歌怨衛聲

答徐耘朝散

昔年汾水上曾遇海南翁欲問三山路先知一溉功萬  
紛銷寂默一氣抱冲融更約丹砂訣他時訪葛洪

催發諸邑民兵至朝邑縣官未至遂宿其驛

羸馬趨程晚衝風雪滿衣城荒更鼓暗市冷吏民稀烏  
壘兵初起河橋客未歸北行殊未已捧檄寸心違

月

玉露漳川月相看幾上弦氣橫秋浦白輪帶女城偏半  
魄蟾猶隱分枝桂未圓雲衢誰可到柅轍駐流年

竹

園竹三年種今春綠始稠未知能却暑但愛不悲秋影  
補頽垣缺枝多暮翼留近因開小徑時有客相投

蝦蟇碓水

泉出蝦蟇碓名高陸羽經細分寒乳白散落曉巖青  
歸客停松檝臨江貯鮮餅神仙雲母液烹飲養頽齡

江公著舉棊無偶忽敗于予有詩戲用其韻

忘暑憐楸局含風愛竹窗料兵聞舊怯築壘納新降  
舟渡焚秦水兵分泣楚江君知猿臂將國譽世無雙

觀山郊閱武

疊錦聯貂帽飛光散羽旗虎文雙箠重金粟小鞦垂望

鵲翻雲沒呼鷹駐馬遲更聞傳令去先促羽林兒

榆落山連壘川平水帶城張兵圖野曠吹角怨秋清移  
帳高雲動開鐔碧海驚歸風回勝氣西北掃欃槍

晚客狎至應接不一或有疑者作此詩示謝敞  
教授

岸幘扶藜杖移床傍晚林形骸猶是累語默更何心望  
外浮雲薄涼生古汲深自憐多懶僻塵色悶孤琴

荅分守魏大夫

坐憶金臺別于今十四年新恩乘五馬北首渡三川  
縣急均嗟戶邊傳助餉錢晉民衣食薄移柱聽調絃

舟行出峽先寄峽州太守榮子邕同年

幾日方離峽舟浮任所之江開平岸闊天遠去雲遲  
心折襟分後身存痛定時晚亭登至喜歸信半年期

峽州江岸

客亭名至喜予前過此與子邕約半年同歸今得如願

依韻酬趙令之

相逢三十載少恥事驍雄封植思嘉樹交遊嘆谷風雲

山輪迹少葵藿歲時充  
冉冉秋還暮霜寒泣候蟲

呂子固置會有詩張芸叟邀予席上依韻和

故國歸來晚相逢共老年  
聊從浮白飲莫擬畔牢篇  
花近紅侵坐槐新綠媚天  
還丹消息斷無惜放杯傳

還王天倪詩卷

素尚躋遐曠平生厭淺浮  
錦囊刀尺古江渚蕙荃幽  
翹首孤雲遠踈林暮葉秋  
十年人不問寂默老荒丘

酬喬世材推官

地僻人來少公庭吏散時  
亂蟬號晚日涼葉下高枝  
仰羨知歸鳥先書寄遠詩  
只應今夜月偏解照相思

答推官李珪

吾族柯條茂人稱孝子賢  
新游思我共舊學欲誰傳  
每愛鸞鴻志徒嗟犬馬年  
青雲如得路驪首看揚鞭

和張裁推官遊湖

閒弄香蘭楫斜開紫綺襟  
回風收雨脚靜月到湖心  
高柳留疎翠前山動夕陰  
興來行處愜樂罷感還深

寄延帥趙龍圖高

瘴嶺有毒霧鳴沙無美田  
乾坤滋孕毓山海限腥羶  
干舞旄星落弓橐譯舌傳  
但能思上策何必勒燕然

戲答山人趙穎憶山居

綠髮年來改相看憶去頻  
青山不厭客黃屨自迷塵  
耳冷泉聲淡松殘藥竈貧  
白雲他日見應問世間春

新蟬

病耳不堪聽仍愁露下時  
纔能升木杪便解入雲吹  
漫

有真仙契猶多風樹悲美陰如可託後患亦須知

太學試駕幸後苑觀穀

禁籞開清曉宸心喜豫遊鳴鸞迎霽日嘉穀茂高秋秀  
穎晴光爛雕輿睿鑒留晨光照金粟喜色動珠旒綠野  
勤農力青編藹帝猷周人豳頌在王業起耕疇

依韻酬沈仍長官惠葡萄

異果乘秋熟分來道路長緘封湘篋重題詠剡藤光氣  
蓄西河潤山圍大谷涼龍鬚初引水馬乳晚經霜衣薄

輕鉛粉包圓小紫囊膏腴凝紺液甘酢溢雲漿蔗泥含  
餘潤醅浮帶舊香藥經難髣髴畫筆漫形相涇洛宜秦  
土汾嵐利晉鄉鱗差分萬葉珠寔綴千房楚瑞慚萍實  
江奴笑橘黃破醒生靜爽滌熱憫新嘗契闊初心在提  
携遠意將茂陵遺客老瘡病證仙方

欽定四庫全書

潘水集卷十四

宋 李復 撰

七言律詩

垂拱殿賜對蒙恩入省

黼座親瞻咫尺威恭承天語慰衰遲錦書殿陛初傳賜  
白髮郎潛且漫為九日重分番直夜

刑部先郎官八人  
予到為九人重分

直寓六參便赴早朝時自知麋鹿難馴習深媿鷓鴣接羽

儀

雪中早朝

正衙冠劍拱星齊  
清曉天花舞御墀  
玉殿影深分扇早  
金爐煙濕散香遲  
雲低含潤侵珠絡  
風亂飛花拂羽旗  
班退便疑凡骨變  
自驚身得到瑤池

會聖宮朝謁

七葉丹成不可攀  
藥珠宮殿翠微間  
千年空怨龍髯斷  
億世曾聞寶笈還  
宮女祠歸朝路靜  
嶽神碁退曉風閒  
五雲高宴蟠桃罷  
鶴馭時應會此山

省中寓直次劉巨濟職方韻兼示祠部張臺卿  
銀鐺司鑰禁門重寓直高秋此夜同樓外歸雲迎霽月  
宮中傳漏帶疏風衰迂豈合參新論俊少何堪接野翁  
華省分曹占列宿經時飽食愧無功

再任提點雲臺觀

天光垂碧抱瓊臺藥殿珠宮對嶽開峽口巴猿初別去  
海東遼鶴又飛來三生難轉靈源靜六歲空驚迅景催  
欲挹蓮花峯頂水普將甘冽淨浮埃

守鄭易陳方及境改信都過大名書呈呂太尉  
淮陽閉閣欲偷閒新捧除書墨未乾五日御風方假翼  
兩河試郡別移官生緣有定隨流易世事無端用力難  
今日得陪門下客一枝容息便心安

京西初歸作

少年輕喜欲憑虛誤落塵中二紀餘生事蕭條寒葉散  
故人寥落曉星踈殘骸已脫風波晚清枕方回醉夢初  
却覓漁蓑尋舊釣一溪煙雨伴春鋤

乞罷未報承延晉秦慶皆惠書

東西南北閱光陰邊意蕭條老境侵四府飛書慚過譽  
數疇廢壤媿初心傾懷敢望時情合論事須思後計深  
髀肉久消筋力倦但能操筆謝知音

九月十三日夜偶書

林葉紛紛已半凋陰雲不放眼周遭稍知風逐青娥動  
更覺天騰北海高萬里無心思假翼百年多事喜持螯  
山前沙井通幽圃待得春深弄桔槔

熙州再乞罷

未途潦倒媿知音幕府重來歲月侵狂見請纓憎往策  
禮容著帽感虛襟白頭久厭戎衣窄顰面空嗟寒色深  
東望故山今有約清秋應得訪雲林

乙卯七月十六日忽報罷任

掩關忽報被刑書自笑無堪涉世踈白晝曾聞驚市虎  
殘灰今見禍池魚莫嗟靜影逢沙矢猶恐餘猜及鼠蔬  
逆境自觀還自喜片心無礙一舟虛

上延帥沈內翰

名括字存中

昔年圖史守巖幽每仰高文動斗牛  
千里來登徐孺榻一時如上李膺舟  
激昂囊穎思先出慰藉泥塗欲晚收  
曾咲王筠無事業但題草木作風流

榮路回翔簡帝衷坐煩談笑靜西戎  
金鑾學士承新詔烏壘將軍有古風  
關塞星烽葱嶺遠塵沙毳幕賀蘭空  
平時未便知頗牧今日親逢出禁中

答夔州舊僚被召見寄

聖恩優厚得西還  
又向雲臺作地仙  
顧我今生如若李  
喜君頻酌似甘泉  
一篙已占南溪水  
二頃初無負郭田  
他日題詩如欲寄  
為尋茅屋白雲邊

搗藥岩世傳昔人煉丹得道今隱於此山下土  
中時得丹粒服之愈疾

超世猶存救世心  
深山相遇不知名  
巖前時得丹砂粒  
雲裏嘗聞玉杵聲  
汨汨流光愁易促  
冥冥濁劫苦難清  
如何為我開靈島  
徧使蒼生病骨輕

登北原望京城有作

五季兵銷帝業新  
霏煙雙闕照夷門  
地盤王氣千齡會  
勢據中天萬國尊  
劍佩輝光新日月  
風雷鼓舞變寒溫  
開先神發隨人意  
轡軸於今轉海垠

登美原縣樓

三月春光入眼稀  
試尋高處看芳菲  
影行平野孤雲過  
點破青山白鳥飛  
秦甸氣回驚綠滿  
渭川勢穩競東歸  
憑虛便欲乘凌去  
清吹飄飄已拂衣

登夔州城樓

夔州城高樓崔嵬浮空繞檻雲徘徊百川東會大江出  
羣山中斷三峽開關塞最與荆楚近舟帆遠自吳越來  
雄心乘險爭割據功業俯仰歸塵埃

夔州制勝樓

野蠻荒獠南北羣西接庸蜀東荆門高城獨控江山險  
勝筭爭先日月昏散火燒畬連近岫歸雲帶雨過孤村  
二儀開闢雖重阻須引流波及後昆

自京之楚州

隋柳橋邊一問津，便將行止付舟人。  
土風入眼鄉間異，客路關心童僕親。  
淮水煙開漁市曉，龜山雲動佛香春。  
共傳米價年來賤，取次東遊不畏貧。

過黃牛峽

轉首黃牛百里西，便風不斷滿歸旗。  
青山隨客豈辭遠，白浪催船常恐遲。  
多米漸聞荆渚近，故宮欲問楚人知。  
今朝共話平安喜，更得長魚伴晚炊。

大江

西南水會大江出萬里奔激瞿塘開神宮龍府雲霧暗  
渦轉峽盤天地回岷山發源四瀆長廬峰白浪九道來  
剗舟濟涉萬世賴積金覆舟吁可哀

荆門軍蒙泉

遠山分脉發巖陬六月虛堂客意秋無限寒雲噴不去  
有多鳴玉碎無休清涵錦石斑斑麗秀吐金蓮熠熠幽  
美潤散分周下澤餘波還入楚江流

過葉縣

南對黃山百里峰雙溪夾路碧溶溶難追舊事飛仙鳥  
但有餘風喜畫龍柳際秋晴分穉稔亭陰晚色見芙蓉  
襄城已遠方城近圖誌分疆入楚封

移官慶陽過定平縣

春郊二月浴蠶時傍岼溪流可染衣谷轉城深鷺柳暗  
地寒春早見花稀三年厭應西烽急千里重隨北鳥飛  
若問前籌慚潦倒欲辭虎帳訪漁磯

過天門關

龍鍾雙袖馬駸駸來往榆關日向深  
多病出門愁遠道早寒平野苦層陰  
泉流危棧新冰滑風入長林暮葉吟  
觸目淒然何所補高枝巢穩感歸禽

峽山阻風

黃牛白馬渡驚灘兩目盲颺更險艱  
天地容身惟一榻江湖駭浪動千山  
豪商競利能爭捷陰鬼多私故作慳  
歎息隣家田舍穩柴門深掩日高閒

定昆池

風煙當日競豪華故里猶傳貴主家何處可尋樓下水  
平南不見面前花陰機鬼伏天沉海危禍波翻骨委沙  
遊客乘秋興永嘆高林不覺見棲鴉

分按洛西諸邑登山出永寧西望晚宿韶山寺  
雙旌明滅轉委蛇行徧秋山意若何暗谷路窮平野濶  
回巒石斷亂泉多峻陵東盡開周邑熊耳中分放洛河  
欲舉因緣尋隻履夜深隨雨到巖阿

胡義修推官再招彥桓與予同遊龍泉寺

江曲花開惱醉翁，經旬出飲獨床空。  
芳羹間筍溪毛碧，異果堆盤海藥紅。  
盡晚莫辭千日酒，餘春已怨幾番風。  
主人清韻家聲在，伯始源流到眼中。

彥桓奉檄將行同飯素於龍泉寺

西江吸水試龐翁，再訪祇園問色空。  
古殿香寒消宿篆，晴林葉暗退殘紅。  
衰年再乞千家飯，逸馭初乘五日風。  
曉去清明邊檄急，前旌高下亂山中。

過香積寺

迂轍來尋昔歲題恍然前世意猶迷  
荒庭老樹半空腹壞塔野禽爭暮棲  
晚學盡驚新使節殘僧時認舊沙彌  
松房自出成何事二十餘年東復西

遊山寺

山後山前紺宇開閒携藜杖結青鞋  
霜欺泉溜羣流淺風勁林彫萬壑哀  
到處每逢清衆出有時偶伴野人來  
裴公看盡因緣在百塔龕前首重回

寒泉亭

孤亭結架開巖扃山深氣偏冬常侵驚浪一溪噴飛雪  
陰簷五月垂堅冰長風不斷響空峽崩石欲落纏巨藤  
三伏火雲愁病暍投鞭知有幾人登

題大圓庵

星郎步履在清禪雅結新庵賦大圓譬喻河沙終未盡  
含弘法界外無邊渾成獨轉離諸相不立中間絕兩偏  
聞說毗耶在方丈衆人欲問却茫然

焚香置榻拂甃旣困倚蒲團坐結趺丈室曾瞻一居士  
臺山豈有兩文殊信心自得超三界明眼何嘗滯四隅  
伯雪相逢能目擊電機已笑涉泥塗

題武侯廟

梁甫高吟一幅巾  
睽翮衆盜肯同羣  
久蟠丘壑雖龍卧  
默計江山已鼎分  
庸蜀欲開來日月  
隆中先見會風雲  
雜耕初動明星落  
千古英雄泣渭濱

天厭炎靈暗不開  
欲吹餘燼發寒灰  
強因徐庶南陽起

能枉周瑜赤壁來常見英風吹草木尚存精魄動雲雷  
西南遺愛無時歇不逐長江去不回

女兒山女仙廟

絳節高翔不可攀尚留遺几在空山月明曾有芳簫過  
松老時看舊鶴還巖下春歸花寂寂壁間雲暗蘚斑斑  
開元已遠霓裳絕野草青青輦路閒

和林次中秘閣題五龍廟

頭角蟠潛歲月沉腥風不散古祠深曾聞驚電開巖壁

常見屯雲宿殿陰，蒼蜴吐冰藏暗穴。  
彩虹收雨出長林，荒碑磨滅無遺事。  
猶冠龜跗壓翠岑。

屈原廟

古廟荒山暗水雲，歲時歌舞感鄉民。  
幾傷讒口方離國，欲悟君心豈愛身。  
慘慘飛魂號帝闕，冥冥齋志託江神。  
千年自有遺文在，光焰長如日月新。

題解梁驛舍

三年去國苦飄零，滿面風沙漫度春。  
白日驅車無住客。

青山當路亦為塵東經鹵澤初迎雪西出蒲關欲問津  
何日投鞭尋舊隱雲間深訪牧牛人

過沔池驛

峻陵臯墓幾摧輪秋暮重過白髮新  
小雨廉纖能滑徑亂山迴互欲迷人  
客心苦厭孤程晚驛舍頻來舊吏親  
明日問途知更遠又須呼僕待初晨

過襄陽

表裏山川舊楚畿築關乘險事皆非  
槎頭魚盡無新語

峴首人亡失隱扉  
雲外煮茶僧室靜  
江邊酤酒客帆歸  
我來駐節無言久  
為愛春流可染衣

初至鄭州

二年青海困征鞍  
歸望天威咫尺間  
雨露忽頒西輔印  
鴛鸞阻綴紫宸班  
往來擾擾無虛日  
應接紛紛祇強顏  
吏責無窮人事拙  
夢魂時到舊家山

過臨晉縣適調發

半夜驚呼府有符  
河堧荒邑應軍須  
冰生垂血辭鄉淚

風漲飛塵出塞車千里饋糧人未返百丁團甲戶無餘  
天邊旁午流星使更見河橋急羽書

韓退之舊業

城南舊業訪韓符門掩荒榛老木踈陰洞尚寒難駐客  
短茅初葺未成居崩崖亂竹從欹倒糝逕飛花不掃除  
舊集遠年今散逸蒼碑但刻馬鳴書

八月十六日後池上

竹戶深扃滿徑苔芙蓉落盡曉池開數番雨勢隨風去

一片秋光入座來，已老林蟬餘韻斷。  
將歸簷燕強飛回，沙鷗時下知人意。  
近岸相親眼不猜。

種說山居

隱君奕葉為清門，誅茅卜築歲已深。  
池影青蒼山墮地，松枝夭矯龍出林。  
六月取冰自鑿谷，百壺進酒不論金。  
阮生熟醉無臧否，今愛遺風杜曲陰。

客來稚子出簷門，潔灑虛庭屢汲深。  
西澤千塍連別岸，南山一帶是家林。  
泉清野果浮蒼玉，燈散靈峰見紫金。

晚日已收涼氣動容歸相送步松陰

是日南峰  
聖燈現

### 抱甕軒

擾擾誰知巧喪生惟君智巧不關心為能懸解如莊叟  
會識真風在漢陰閒笑重輕爭俯仰靜忘身世任浮沉  
堪嗟混沌亡來久今獨憐君踵息深

### 郊居

閒原渺渺散䟽襟風舞淵潛自樂生春到雲山惟杖履  
日長天地獨柴荆百年雖健猶親藥一飯無多嬾問耕

常羨子喬仙馭遠笑悲滄海世人情

三月二十八日園中作

泱泱清溪漱遶堂興來隨意轉藜床畏人野鳥疑花動  
收蜜山蜂誤酒香杏子帶鬚紅半抱藥苗退甲綠新長  
風光須是閒時見身世今欣已兩忘

和夏日園中即事

雨過深園暑氣清拂雲松竹映重闌預期節物移承露  
自驗方書採合昏片影有緣聊暫寄寸心無事得閒論

風光未信隨流轉猶見飛花落酒尊

園中獨坐

高樹風輕葉影齊新荷破卷綠猶低日長松下少人到  
坐久竹間聞鳥啼萬里驚波逢寶筏百年病膜快金篦  
雖知赤水遺珠在問路襄城舉世迷

李氏園

城近斜臨南郭路地寬分得奉誠園垂竿引水穿回徑  
種竹成陰補壞垣曉露不收荷已敗新霜將落柿初繁

天晴野曠秋風厲借榻虛堂負午暄

過李氏園

伊川北首始知春問路停驂僕候門垂柳萬顰梅一笑  
蒼松四出石雙蹲高人舊隱家風遠祥兆開先國邑尊

地名大  
宋川

昔歲往來曾駐蹕從臣遺刻在雲根

陸渾王秀才園

兩歲伊川擁傳行往來屢喜訪雲扃四時溪水喧巖石  
六月山陰滿戶庭每到似開雙眼翳久居應滌百骸醒

露香浮座供賓餉涼葉生風野草青

和題屈氏園

密樹煙深綠映門  
入門清絕隔囂塵  
須知澤畔行吟客  
便是林間散髮人  
山色滿樓何處盡  
花香過酒逐番新  
東風時引閒雲到  
留作輕陰欲駐春

杜城陳文惠公園

有桂林亭

杜曲西遊訪物華  
門前滴水綠涵沙  
南城天近無雙輿  
北斗魁前第一家  
當日不知龍臥久  
今朝空羨桂交花

高文遺墨皆漫滅林下祠堂春日斜

和范君武出郊

九月天高客喜晴籃輿因興度溪行身逢樂歲留漳浦  
心逐秋風入渭京日暖登場多稼熟桑陰具餉野盤盈  
豐年社後多餘酒處處神林簫鼓聲

和人遊千金公主園池

溪流古堞帶林高林下行通小水橋但有春風催載酒  
更無仙鳳伴吹簫花間鳥散驚藜杖沼際波回轉桂舫

塵迹尋餘思一弔楚魂飛盡不能招

後園小池

鑿地開方斷石根潤通草樹亦欣欣  
築基偏傍孤亭濶引水初從曲徑分  
風約落花回近岬露垂敲竹滴圓紋  
春晴山鳥常來浴淺處喧喧故作羣

城陬荒僻自開鋤野性難忘水竹居  
岬側星機楮錦石波心仙仗立紅蕖  
閒中有客唯來鶴靜去無竿不釣魚  
八卦神靈今可問玄夫時出御輜車

和韓丞相玉汝登見山閣

丹青岌業冠鼇丘地闢天開洗百憂萬竅倚空號一噫  
八川盤野會千流浮雲晚日悲餘翠廢苑荒陵怨暮秋  
自昔登臨思善賦高吟豈向世間求

遊柏谷寺寄范君武

絕塞初歸喜澣休東城送客偶成遊山前欲訪青蘭若  
林下初聞黃鸝鷗雙履高窮溪水出一身輕共野雲浮  
寄聲德操還能否炊黍吾過為少留



欽定四庫全書

集部

滴水集卷十五

詳校官庶吉士臣吳烜

侍讀臣孫球覆勘

膳錄副貢生臣趙賜珍

膳錄監生臣孫永治

欽定四庫全書

滴水集卷十五

宋 李復 撰

七言律詩

賦杜子美劉夢得遺事

壁間石刻圖經在，灤外祠堂繪像真。  
秋去書懷傳北客，歸時遺曲祀蠻神。  
十年口語投荒謫，千里兵戈下峽身。  
嗟我南來心跡似，臨風把酒寄情親。

杜在夔有秋日書懷寄鄭審秘監李

之芳尚書詩百韻劉有別夢詩云惟  
有九歌詞數首歸時留與賽蠻神

王穀節推畫草蟲花竹求詩

細羽爭飛翠萼長  
窓間留影點綃光  
寧知臂朽專蝸翼  
但見心精妙楮芒  
詩學蟲魚增舊譜  
藥圖草木驗仙方  
請君放筆開高臆  
縱意雲龍五色章

王氏園置燭觀梅

堂前梅樹花初徧  
露坐看花對夕風  
苦恨夜收春色去  
故移燈入素光中  
亂爭短髮愁邊白  
清映衰顏酒後紅  
醉眼却來尋不見  
只疑林月碎玲瓏

依韻和秦倅陳無逸觀梅

渭水冰消意始回肌膚玉雪本仙材江南氣暖常先見  
隴坻山寒不易開二月莫傷春色晚一枝豈待嶺邊來  
風光切莫輕流轉未放悲雲畫角哀

觀梅

懶藉霜威欲斷肌傲霜挺挺發南枝微風披拂香來去  
皎月勾添光陸離已入鸞臺弄粧手猶存谷口出塵姿  
苦無踈影橫斜白深愧林逋處士詩

陳再有詩誚梅開晚戲酬

漠漠飛香散不收，無言對客似含羞。  
雖非雪裏孤根暖，却免黃時細雨愁。  
爭意競先多淺俗，高情持重自風流。  
一株又見垂垂發，肯學江邊取次休。

和林次中五鬢松

僊人五色鼎中丹，丹養松根葉不添。  
雲散細風梳碧縷，龍離遠嶠奮蒼髯。  
雨衣鐵澀封霜甲，露點珠明滴翠纖。  
採釀春醪能愈疾，欲求方法檢書籤。

詠槐

當年夾路綠參差曾擁金輿拂羽旗  
得地偶逃斤斧幸聞風非與雪霜期  
猶殘臘火燔空腹時有驚雷起蠹枝  
想見妖靈占上象龜山獵罷舊都移

古槐踈慘倚頽牆病葉先秋已半黃  
封植不知何歲月彫零今困幾風霜  
老根傍出人供爨蠹腹多穿馬繫韁  
嘆惜他年承愛賞清陰曾借暑天涼

和進櫻桃上宣諭近臣浴中今年進櫻桃甚大

當日分賜

四月櫻桃始爛紅，拜章馳驛歲常同。  
留都舊事修邦貢，薦廟清朝廣孝風。  
翠籠摘從西後苑，彩奩進入大明宮。  
近臣曾見天顏喜，清曉分頒到省中。

和人汰竹

與世論交獨厭數，此君多冗豈無煩。  
欲期虛靜延清影，莫懶芟除去惡根。  
漸見遠山開晷霽，更無繁鳥亂黃昏。  
直須放手留閒地，別待春雷見子孫。

和人筍詩

葛陂龍去已千年每見遺孫出是間未遇嚴霜懷節久  
因生平地立身難長崖氣潤雲藏角暗谷叢深霧養斑  
春晚向空重籜盡却驚高意不能攀

和周湜雪

雲表爭飛鏤玉花衝烟照水弄光華徧粧庭樹能多巧  
亂入風簾不奈斜漠漠揚花迷客徑紛紛蝴蝶滿人家  
寒簷向晚凝清滴乳洞春硝長馬牙

六合天人競散花坐驚門地亦清華川原霽後龍鱗出  
島嶼平時鳥篆斜秀發園林春萬里寒生樓觀月千家  
待看陽律還暄早破潤乘凌見翠牙

暮飈作氣動長林渴意經時恨未深亂學飛花穿竹戶  
散搖清影落池心生憎拂面輕難改更覺衝風薄未任  
狡兔但從開幾穴韓盧會逐曉蹤尋

毳毳亂舞出烟林落以臨階試淺深平盡高低寬眼界  
放開虛白見天心狂傾月窟愁將竭厚壓坤輿恐未任

潤澤功成本無迹便回春意欲同尋

和朱給事上元早雪

玉花清曉作餘寒雲暗重城掩霽間初逐細風飛寂寂  
旋隨小雨潤斑斑萬家燈火方行樂九陌輪蹄肯放閒  
向晚霽開斜照在門前柳色未藏山

和孫侯朝奉立春

閏餘隨臘報迎春便覺勾芒令有神流轉光陰頻著物  
崢嶸歲序苦驚人花裝寶蠟餘枝弱菜點彫盤小綠勻

從此試聽枝上鳥漸傳芳信語言新

梁元彬招池上府會辭之以詩

東郊日日喚春催得意晴天浩蕩來病客強因寒食起  
新花不為老人開塵埃邊叟拋書卧鼓吹山翁倒載回  
欲問湖光幾時淨試容扶杖獨徘徊

和郭戶部中秋月

重雲宿靄風收盡千丈銀毫吐海涯露氣洗開青玉闕  
龍宮浮出白蓮華寒鷺棲鵲翻庭樹陰引靈珠耀浦沙

我是襟中修月手玉皇應許上仙槎

潞守歐陽叔弼召登鼎軒暑飲

崇軒寫物體模分爽拔風攜顥氣升王漿消憂思眺聽  
本初持飲滌煩蒸金烏不轉銅壺箭碧盃時分玉井冰  
每見喜公如玉雪更因執熱服吾膺

再和叔弼暑飲

古製雖存事一新竒峰時作火雲升憑風高棟能虛爽  
欲雨炎天故鬱蒸適意浮沉多野果熱中咀嚼喜清冰

別裁偽體親風雅若比陰鏗豈敢膺

答晦叔求飲

墨客高吟動碧雲  
蕢桴輕笑鼓雷閩  
千尋自分遺樗散  
百和何堪借棗昏  
按劍夜光驚暗擲  
揮絃流水喜新論  
久聞逸興須酣發  
願看長虹出淥尊

和江海叔喜雨

千里人懷閔旱心  
輕將歲事叩天閭  
驟傾江海繁聲合  
盡滌山川沴氣昏  
官責時豐聊共喜  
歸休興動欲誰論

更思田父相邀樂步屨春風倒社尊

和朱公揆給事喜雨

喜雨高吟夜不眠飄飄秀句選青錢已推覆斗占穰歲  
誰事操豚祝下田滿澤新秧初放溜連雲高樹欲生煙  
未知美價堪多少洗盡人間苦暘天

中秋客至不赴郡會次范君武韻

經歲相期盡賞心虛堂有客阻趨塵登樓君似庚老子  
挾策我為臧丈人清據胡床興不淺來尋竒字夜相親

莫言糟粕無佳味未許桓公媿斲輪

和李獻甫守歲

枯鰈乾栗排野盤擁爐酌酒兒女筵却愁詰朝祇明日  
便數今宵為去年瞻星惟恐斗柄落續膏更願燈花燃  
小癡老怯坐自笑無補漫廢通夕眠

次韻鮮于之武遊南谷

桓字彥

山光娛客古城東雲散春陰望處空畏影戲魚依藻綠  
避人飛鳥動巖紅林間野坐分溪石岸曲晴行喜水風

舊事共高文字飲新遊盡寄語言中

芸叟召杜城晚飯遂宿於東軒欲同遊五臺寺  
有詩因和其韻

第五橋東滴水濱山紅湯湯綠紛紛溪邊童子風雪舞  
林外先生植杖耘高論但談雙樹法勝遊將步五峰雲  
東軒夜久清無寐山雨初從葉上聞

次馬承議韻

浮雲飄忽竟多姿蒼狗須臾化白衣對客莫思捫蝨語

乘風且共跨鯨歸巖巖清壁三千仞鬱鬱寒松四十圍  
君看時光易流轉新霜高葉又朝稀

依韻答俞承議

南北相望已十年白頭相見喜留連風埃異國君多感  
朱墨勞心我自憐事可寸心能有幾生無百歲漫憂千  
一聞新賦思歸去韋杜溪邊訪舊田

次韻李忱承議所惠詩

字天輔

人生飄蕩若浮雲邂逅乘風忽聚羣嗟我淹留今倦宦

喜君傾倒細論文揚舡覺海宗提印授鉞詩壇勇冠軍  
荒學湯勞無所得鼻端聊假一揮斤

和胡漕鬪茶分藥

萬里飛香入晉山高真秘錄露談端春雷發地巖驚綠  
夜鶴飛壇鼎轉丹仙桂清風生兩腋玉壺五色抱神丸  
虛談論罷無塵事林外娟娟月半殘

和成季

芸閣磨鉛勘舊經昔聞同舍此同升九楹置榻從頽偃

百尺浮空遠濕蒸玉鱗堆盤魚勝雪綠荷傾飲酒凝冰  
家風牢落承推獎深愧龍門昔有膺

依韻和南子強

雲路天門白日開豈無松桂出蒿萊於斯未信誠可矣  
如或知爾何以哉鏗然舍瑟有異撰豈必讀書無取裁  
業廣惟勤今汝畫覆簣不止須崔嵬

和劉丈招與康集同遊韋杜

滴水橋邊縱客車去天尺五訪尋初按圖韋杜風烟在

遺址隋唐錦繡餘  
雨後晚花寒寂歷  
霜前老樹半彫踈

松間有酒來招我  
遠約相依造隱廬

時李支使隱居在杜曲以詩見招

和尹宗閔書記四月二日候客溪上潞守李獻

甫具飯有詩

溪園經歲不曾開  
逸興何妨候客回  
春色堂堂辭我去  
暑風咄咄逼人來  
追涼故繞池邊樹  
分坐時侵石上苔  
皂蓋歸城魚鳥樂  
更延虛靜獨徘徊

酬汾守鄭大夫

鄭公賦政鬢如絲符竹新分晉水湄  
招客遠郊常置驛  
論文古訓舊箋詩漢庭行曳尚書履  
涇谷曾刊隱士碑

今日湖亭共遊汎追懷子美昔同時

李之芳與杜子美同於鄭審秘監湖

舟 亭汎

### 暑中即事

掛壁清羸金粟像映牕性相淨名經  
門前野水流繞舍  
雨後綠槐陰滿庭涼簟醒心須稍健  
好風吹鬢欲重青  
此間真境誰宜到更有珍茶一種靈

靜坐

一室蕭然不受塵簾垂疎竹映深門擁衾調氣煩呼吸  
據案翻書費討論南郭子綦初喪我毗耶摩詰已忘言  
盡傳息慮何須息竅鑿無傷混沌存

和劉君俞遊華嚴寺謁文禪師

華嚴法界出諸天帝網重重絕世緣昔有高僧開寶刹  
今留飛閣聳瓊田身遊色相無窮境心悟虛空不住禪  
碧眼胡人香一炷分來今欲對師燃

靈山勝致古今同  
下種開花一線通  
峴首道安酬鑿齒  
江西馬祖對龐翁  
圓珠迥耀千淵黑  
滴乳微傾六斛空  
我有宿緣香火念  
閒來相與論幡風

暑退病起沐罷倦  
卧得芸叟詩招為  
草堂紫閣之遊酬  
以來韻

八月秋高肺病蘇  
深居吾亦愛吾廬  
晚風剌剌初衣袂  
白髮蕭蕭不滿梳  
困著藜床眠北牖  
遠飛蝶夢訪清都  
覺來聞有雲山興  
親寫新詩欲起予

酬晉倅徐發承議

默默窮年逐衆行  
杯坳浮芥竟何成  
交遊似夢逢還去  
世事如塵掃更生  
未訪故溪舟一葉  
空嗟短髮雪千莖  
病衰易感傷  
搖落一夜西風枕上驚

天輔歸休再用前韻并其弟恪子勉所和詩見  
寄再酬之

西北秋風動碧雲  
經年忽忽慘離羣  
去辭北闕投新綬  
歸老東山綴舊文  
詩遇惠連須長價  
書從阿買可張軍

平生勝理思懸解糟粕徒觀愧連斤

同君俞自牛頭寺至興教院又會文師

杜曲樊川舊化城東西相峙兩牛鳴巖前寶塔藏遺燼  
殿裏長燈續舊明萬法分流皆有相一心息妄自無生  
叢林是處經行徧會向東山記姓名

贈楷長老

靈源獨耀脫根塵豈論空身與色身若論有無寧見法  
須知開悟不因人病瘖得味難形語走餓還家忽忘貧

薪火相交多少險煩師與衆指迷津

天竺僧金總持

金輪風火轉無涯  
震旦觀光渡海沙  
八萬言詮歸貝葉  
三千世界聚蓮花  
有緣禽鳥來波第  
隨喜天人盡水叉  
今古少林風月在  
閉門常御白牛車

蔡元度話其子能言前  
世事江海叔有詩次韻  
應感隨緣各有因  
一源真寂自無塵  
須知此物非他物  
能悟前身是後身  
叔子探環喬水在  
房公發石舊書新

區中誰是王文度證印曾逢竺上人

往來積習幾生身石上精魂世共聞北澗水通南澗水  
南山雲繞北山雲光含衆色珠常靜影入千溪月不分  
試向道人談實相神奇腐臭但紛紛

次韻錢穆父內翰題劉掾詩集

朱絃曾聞三歎曲青松自長千歲枝意來是有我輩語  
佳處只應能者知舊心洗盡萬斛水新愁誰爭半額眉  
清興飄飄仙奕奕欲遊天外戲雲螭

依韻酬張公燮

城下清溪照病容，溪邊開席豆籩豐。  
故應舉酒殷勤處，欲慰踈花索莫中。  
短髮蕭蕭羞帽側，強顏咄咄學書空。  
青山行卜他年樂，深結茅廬訪德公。

次韻李信叔

不見吟翁近十年，驛亭相遇兩欣然。  
旋臨野岸烹河鯉，賸向鄰家送酒錢。  
對雨張燈留夜榻，傍籬繫柳泊歸船。  
此生自斷君休問，早晚須芸杜曲田。

和徐發承議懷歸

駸駸長路倦羸驂  
搔首飛塵苦戰酣  
猿過故山驚曉帳  
苔生舊釣暗秋潭  
土風膏潤田耕熟  
物意清幽井汲甘  
一別幾年勞客夢  
會攜藜杖破晴嵐

和胡吏部醇夫

妙語飄飄慰旅窮  
自憐飢味得甘豐  
朱絃恨廢高山火  
明月驚投按劍中  
垂翅為逢勅敵勇  
傾囊但媿鄙夫空  
相從知便忘形跡  
一鶚先曾玷至公

依韻酌蔡陽叔赴永倅留別

朱紱翩翩別乘行  
候人楚語喜秋晴  
君山木落洞庭濶  
帝子魂歸湘水清  
曾嘆選官稱一字  
舊聞世譽重三明  
餽醜若訪垂綸客  
葦岸夷猶鼓柁聲

次韻呂元鈞給事嘉川驛來詩

相逢莫厭重留連  
邂逅浮雲只偶然  
前日一樽窮樂事  
今朝千里感流年  
塵侵遺跡留漳水  
風入高吟動蜀鞭  
錦鯉往來出江浦  
應傳秀句滿嘉川

送客至西湖

湖亭獨往客初歸  
春去春來盡不知  
新竹出梢纔放籜  
斷蒲經雨別生枝  
山寒藏雪添雲濕  
風送飛鷗過水遲  
却笑偷閒得忙事  
自尋鄰叟問鉤絲

吳安老罷制舉赴安吉任

南北飛鴻迹影孤  
青衫相見十年餘  
中銓簡士歸繩墨  
小邑沉才謹簿書  
游刃屠龍傳世學  
飛章薦鷲待公車  
太平藻繪須文彩  
今日何人誦子虛

送衛奕之西河任

藹藹長空春已歸東風猶在綠楊枝故人錯莫送行處  
流水蒼茫無住時汾上先生能理曲河濱退老喜論詩  
聞君此去追高躅應忘青衫簿領卑

送孫錫

名永字祖修

瘦馬駸駸渡洛行東風莫著褐衣輕為嫌愁夢能催老  
故懶題封去問程千仞會游懸水急五漿須信客心驚  
明朝我向壺闕路待約歸纓共濯清

送張景純

我居杜陵君淮東平生南北馬牛風雲山一日邂逅見  
草木千里臭味同今朝歸心逐社燕他日付書隨春鴻  
不堪立馬向日暮索莫酒散秋堂空

送趙侗承議致仕歸

聊為五斗陶元亮却愛三龍邴曼容蕙帳曉空驚怨鶴  
客衣夜薄感寒蛩江邊朝露半紅葉天際晚晴多碧峰  
漠漠長空何處盡雙鳧飛去曉雲重

送董億朝奉

北游汗漫遺玄珠，烟愁霧泣啼芙蓉。  
興來便脫上方屐，歸去重修繁露書。  
一夢百年依幻宅，五湖千里御風輿。  
家山芋栗應常熟，坐看朝三戲衆狙。

送陽孝章戶曹

前生問學仰前修，親髮星星祿始謀。  
千里束書來北闕，一朝懷牒走南州。  
荷衣未改斑衣戲，斗米聊寬負米求。  
想見江神能世態，開帆風滿送歸舟。

卷十五

卷十五

--	--	--	--	--	--	--	--	--

欽定四庫全書

潘水集卷十六

宋 李復 撰

七言律詩

送人從辟

秋風蕭索塞雲黃  
白髮青衫應辟章  
曾說穰侯常畏客  
今觀毛遂欲投囊  
鴈門舊障雲松盡  
離石新城壠穀荒  
想有高談開玉帳  
尊前妍論灑珠光

李無玷自左正言出守永州召爲吏曹外郎尚

阻叙舊先貽此詩

初伏青蒲拜皂囊，忽驅五馬下瀟湘。  
入承上閣尚書牒，分掌中銓吏部郎。  
焚藁舊垣猶寂寞，拱樞列宿頓輝光。  
聞歸未便能傾倒，五日朝班得綴行。

用周作韻送范忱夫舉歸

白日高懸照九垓，天門欲上却飛回。  
雖聞西蜀題橋去，未放東都走馬來。  
豐劔有神須會合，荆珉蘊璞且徘徊。  
明年八翮乘風起，一振鵬程九萬開。

贈張萬戶征閩凱還

瘴雨蠻烟遠蔽空，只將談笑蕩羣凶。  
旌旗夜捲妖星殞，鼓角秋高殺氣雄。  
已喜張良還灞上，更須龔遂守閩中。  
凱歌聲動天顏喜，金虎三珠擬報功。

寄吏部王侍郎

國門一別四經秋，新命恭承自冕旒。  
碧落神仙來禁闥，青天雲霧隔皇州。  
孔鷹筆下騫光翠，涇渭胸中有品流。  
聞說絲綸推世譽，佩聲好聽上鰲頭。

卷十六  
答董天隱推官

日月沄沄不可追，神奇腐臭略無遺。  
一丘一壑能誰過，相煦相濡莫我知。  
強聒睚眦何所補，雄誇凌厲亦奚爲。  
秋來春去尋常事，安得乾坤獨爾私。

答潞城令谷大同

蕭條寒邑古風深，應嘆光陰恨陸沉。  
莫厭荒山輕廩粟，須思美政慰民心。  
門連露草常封印，吏散秋堂靜試琴。  
欲約仙鳧終未得，東城何日聽車音。

酌張法掾翼求侍養歸

少輕紈綺襲箕裘力學從容與我謀  
擇友卜商能勝賜舞風曾點自殊由  
去乘汴水春舟疾行過龜山楚客留  
千里有聲如寄我須尋臨瀆舊林丘

謁冷朝奉路逢王才元舍人同往

曉路髯翁已我先清時有味獨君偏  
柳深門掩徑未掃花落烏啼人尚眠  
顛倒著衣驚應客咄嗟解榻遽張筵  
雲開日影斜閭闔悵望歸程急馬鞭

答李成季賀授直秘閣

絕域經秋自乞還粉闈春得綴星班  
詔趨龍幄登文陛恩捧芝函入道山  
曲學豈知新說美蒼顏難伴後生閒  
聞君此地淹徊久悵望當年未及攀

酬李公寅留別

歸風何急動征車幾夕相逢意有餘  
綠暗河橋水泮後雲藏山徑雪晴初  
登門曾上千重峻游刃將驚萬竅虛  
他日再來寧可約北鴻時付一行書

別夔州衆官

半年漁浦巴城守兩任雲臺太華宮豈欲背時聊免俗  
但能省事略成風玉泉古刹須留客峽水安流好向東  
祖帳聯翩催棹急臨溪洒淚落丹楓

衛奕其兄被劾得雪惠書及詩

去歲書傳歎鶴鴿新詩甚喜字縱橫龜雖有智猶罹網  
鴈爲能鳴得免烹須信篋中多謗語莫矜堂上有奇兵  
滔滔天下常如此無慕功名取次行

寄朱約之

子墨文章不自珍，連編大軸棄如塵。  
久收幽履安巖谷，但見高名出搢紳。  
欲寄遠書尋素舸，今逢佳士得朱輪。  
放談可講平生學，新傳行觀盡獲麟。

寄舊同遊

去鄉甲子四十二，歸路山川九百三。  
長河無鯉來東北，遠夢隨月轉西南。  
簷花雨落春獨酌，牕竹燈寒夜對談。  
石上精魂能閱世，欲尋前事興方酣。

呂司空壽

飄飄仙馭出蓬萊時節新陽動瑄灰慶闕拱魁三象近  
祥源引派九天回礮溪龍虎家璜在申國風雲舊嶽開  
聞說清臺占異事弧南星步入中台

贈吳德秀隱士用來韻

不計無成與有成但能償足百年心喜營美釀多栽秫  
廣蓄奇書盡散金三代遺文鐘鼎古五胡秋意畫圖深  
超然真趣誰能識目送孤鴻撫素琴

答人見贈

形影何嘗問主賓，真風滿戶養頽齡。  
不從田父迷迴駕，但有漁人笑獨醒。  
開攝高雲遊沆瀣，靜收浮氣借光靈。  
出門無事誰相喜，只對秋山滿眼青。

答范軻

綏城古語刻兜鞬，何事求犀近水燃。  
鄉里後生輕宿學，朝廷新詔急遺賢。  
風回夜月開重暈，驪睡神珠出九淵。  
今日秋臯聞鶴唳，茂先方議斲龍泉。

答李成季

山川錯莫不逢春，京洛空多滿馬塵。  
李渤請歸聊見志，魯褒著論久知神。  
懷沙曾愧垂綸客，擊磬興嗟荷蕢人。  
向老愈憐筋力弱，空傷酒轍泣窮鱗。

答李公蘊

臘前曾約走新春，春到無端絕塞行。  
戍卒催完燈下甲，急烽連入雪中城。  
萬夫擾擾爭分餉，一飯匆匆豈暇羹。  
自嘆東西求斗祿，兵戈已過十年生。

答彭同年勸應賢科

早歲逢予嘆陸沉東風還更枉華音  
五蹄一角必殊相八跪二螯多躁心  
衆惜伏轅傷駿骨自慚躍冶匪祥金  
搏風敢效垂天翼但樂孤巢寄舊林

答李晝宣德示詩卷

志學長年患小成五言今喜繼家聲  
因君筆墨多新語滿路雲山得美名  
才業未堪高卧顯篇章自欲以文鳴  
歸時正是春風好擁轡應教取次行

哀秦金部

少年書卷是生涯  
白屋清朝自起家  
數上封章思有補  
一生悃悃靜無華  
初瞻玉節星軺下  
俄見銘旌粉篆斜  
天理冥冥誰可度  
但傷零落掩淮沙

王夫人輓詞

家聲昔冠秦中望  
婦學今傳潁上風  
百歲流光方過半  
新春逝水忽馳東  
丹山鳳泣歸巢冷  
寒月烏啼反哺空  
他日拂絃悲舊曲  
應將哀恨寄孤桐

鬱鬱佳城潁水涯  
素旌今見出重扉  
不逢玉鼎仙丹轉  
忍見春風畫翼歸  
馬鬣起封占鶴表  
錦書賜邑得烏衣  
須知千古芳魂在  
漠漠孤雲嶺上飛

弔朱給事

筮仕西州佐邑時  
高才不厭簿書卑  
清修與衆初難合  
真節當朝晚始知  
諫苑塵埃多舊藁  
佛宮粉繪有生祠  
與君家世重重契  
祖奠靈車涕滿頤

棣華齋

真長世譽賢兄弟棠棣名齋爲學詩華廈何妨因舊址  
春風不老是仙枝攀條漸見傳芳遠和氣先從近本知  
顧我彫零長弔影感今徒益鬢如絲

託人求田

綠遶隨城瀟水流百年那免問菟裘泉甘易汲能蠲疾  
土沃翻耕每報秋欲託高人論地券共期他日老漁舟  
歸身未到心先到得此餘無一事求

殘編

殘編斷簡事寥寥購輯成書匪一朝韋述投山藏舊史  
肩吾去國失宮謠須知孔壁遺文在豈逐秦燔烈焰銷  
博學多聞予所仰喜君攜笈過衡茅

青布道人

逸意閒雲野鶴孤藥苗山葉綴衣裾新蒸石卵將留飯  
戲酌銅盤便得魚療疾但分庵畔草吐言不出世間書  
五年密密求真訣始露三元御氣車

道士李得柔行太乙法曾傳御容

處世能求出世心石壇深夜禮星辰徧遊五岳求真訣  
獨向三清有主人妙筆曾開天日曉懸壺常鎖洞山春  
不知何事飛符動又見荒林聚鬼神

予昔爲河東漕屬吏部郎中呂得和出總漕計  
與予情均兄弟後開府荆渚惠書有的人生難得  
相知之語予後官守鎮京兆聞呂之訃因發篋  
得舊詩感而作此

三年發篋墨猶新蹤跡雖疎意更親雲霧渚宮迷遠夢

兵戈青海困飛塵

時方收青唐

飄零劍外叅謀客

杜甫為劍外叅謀送

韋班詩云飄零為客久衰老羨君還

愴惻山陽感舊人

向秀思舊賦濟黃河以泛舟兮經山

陽之舊居顏延年作向常侍詩流連河東遊愴惻山陽賦

今古交情如覆水為君涕

淚灑新春

李毅師載出塞歸熟食日邀客湖上有詩求和

遂用其韻

新知劍外朱無阮舊侶江邊白與張去國杜翁為客久  
傳詩韓老遇春忙一年喜競清明日千里歸從戰伐場

山寺雪消雲已暖，湖亭冰盡水生光。  
半生幾見逢三雅，此舉無辭畧百觴。  
莫負高名興苦歎，靜中閱盡喜難忘。  
五言絕句

宿興德寺

東峰霽月出林叢，寒露明夜久風漸息。  
深院無人聲

七言絕句

登後峽寨北山

薄落山前菊未開，鬱孤水畔獨登臺。  
明朝匹馬衝霜去

直到鳴沙北始回

予往來秦熙汧隴間不啻十數年時聞下里之歌遠近相繼和高下掩抑所謂其聲嗚嗚也皆含思宛轉而有餘意其辭甚陋因其調寫道路所聞見猶昔人竹枝紇羅之曲以補秦之樂府云

柔桑葉苑暗東岡山下亂石如羣羊舊沙漸高行路斷  
馬蹄踏散飛星光

縲絲宛轉聽車聲  
車聲忽斷心暗驚  
舊機虛張未滿幅  
新絲更短織不成

東來健兒身手長  
不隨伍籍習弓鎗  
何須官廩請租稅  
白晝衣食出道傍

短衫窄袖上馬輕  
空手常喜烟塵行  
論功何須問弓劍  
自有主將知姓名

牛車欲住更催行  
官要刻日到新城  
軍有嚴期各努力  
秋田無種何須畊

蕃兵入市爭賣田漢人要田蕃無錢有田賣盡走蕃去  
却引生羌來寇邊

白羌紛紛急攻城羌酋却走殺漢民漢民當前死不惜  
甌脫更有殺來人

隴山連峯入無際天畫封疆限華裔如何鎗斨忽中裂  
西通風來動邊氣

鳴鳳山西五里坂未渡沂河山漸淺東來行人漸長嘆  
已覺秦川不在眼

垂白東西幾田父林間偶坐忘巾履共說乾餱付遠人  
六月長丁猶築戍

予幼侍先人作邑夏陽元豐五年來攝是邑過  
漢泉題其亭壁

井邑依然舊物華行穿溪樹踏溪沙路傍故老遙驚認  
十七年前縣令家

再授雲臺觀過華陰題此

脫身西去度函關踏雪重過阿對泉又作蓮花峯上客

祥飈高御紫虛天

過方山驛

驚塵拂面三十里走馬東西不識春  
忽見長堤新柳色一時聊慰倦行人

飛泉

銀河一道下天來蒼壁衝雲萬仞開  
白浪駕風千石轉四時不斷響驚雷

卧龍院

杲日珠光照舊都  
試從雞足躡蓮趺  
橫身何用論明暗  
果是能揮寶劍無

留題北禪院

偶到叢林訪可休  
南山依舊滿晴樓  
垂釣漫有深潭興  
徧滿乾坤是即收

隴州神泉鋪後池

山腰綠映女郎祠  
祠下泉通竹下池  
時有游鯈自來去  
祇應曾見理釣絲

題甘茂祠

奮身孤旅相秦王欲去憂讒論樂羊不有私金助公賞  
可能明日拔宜陽

王導

鄒人羞比管夷吾可復中原盡羯胡郊壘連雲困衣食  
縱高練布得充無

曹參廟

百戰皆收第一功幾回旁嘆泣良弓白頭始識人間事

歸向東州問蓋公

王翦

少李輕兵去不回  
荆人勝氣鼓如雷  
將軍料敵元非怯  
能使君王促駕來

孟嘉

不將得失供談笑  
此語宜爲盛德人  
千里同風皆默契  
褚裒故識坐中身

陶淵明

接輿歌鳳溺沮耕獨往何堪與世親  
投綬歸來眠北牖  
高風自是葛天民

二月五日柳溪遇風

狂風擺撼未肯休  
直須枯枿生新柔  
老松倚雲不關意  
開落曾閱幾春秋

秋庭夜閒步

高秋夜氣聲驚竹  
寒月徘徊影起人  
此境靜觀如啖蔗  
後來細嚼味尤真

答安陽叔兩絕 集唐人句

春風吹園雜花開  
漸老逢春能幾回  
不嫌野外無供給  
一杯一杯復一杯

兩人對酌山花開  
青天露坐始此回  
嗟我與君皆老矣  
且盡尊前有限杯

謁詩僧慧益不遇

畫公昔在雲門寺  
曾笑陳丘久不歸  
草坐麻衣今不見

獨來林下釣寒磯

唐僧靈徹寄陳丘二侍郎詩云身老  
心閑無外事麻衣草坐亦容身相逢

盡道休官去林  
下何曾見一人

和崔珙望子嶺觀梅

高枝踈淡小花頭  
開向殘春破客愁  
點墨空山慰寒晚  
却如何遜在揚州

崔珙推官話王園  
再如昔年爲梅下  
之會并示  
絕句和來韻

王家梅樹春常早  
露坐曾侵月影來  
聞道去年還得意  
新花還似舊時開

閻先復朝議園牡丹一本四月始開予與李成  
季同往觀閻求詩遂書絕句於其壁

淺蘂凡葩不自持紛紛競鬪早春時  
高情獨負無人識  
落盡羣花晚始知

戲書德公軒後桃花

百葉仙桃倚故臺劉郎去後幾時栽  
紅塵拂面人來看  
只有靈雲放眼開

花發雙林七寶臺出門是草不須栽  
東風一夜都收去

爲問仙桃甚處開

和張總管菊

雲裏霓裳閑儼雅  
霜前黃鵠獨軒昂  
不從春意裝褉巧  
却被秋風漏泄香

開落紛紛不自知  
春秋莫較後先期  
清霜滿地凋零急  
正是黃花得意時

和呂吏部觀延慶院李唐畫山水

道人曾去禮清涼  
幻出臺山翠壁光  
聞說幻師能幻幻

烟雲草樹攝他方

遊戲仙人出道場  
寶山珠樹發神光  
坐間舉手分天界  
移入毗耶一室方

深蒨雲嵐遠意蒼  
寶伽猶帶海波光  
須知應感神通力  
舉步相隨徧十方

題畫馬圖

龍種天駒產渥洼  
五雲毛色散成花  
瑤池一去無消息  
只許丹青紙上誇

題嚴賢良東山集

謝公高志渺浮雲對奕從容靜世紛坐客偶然談小草  
無言徒媿郝叅軍

項城主簿趙岍求書惹雲亭爲系二絕

東西飄忽本無心留礙危簷便不禁向晚前山風力薄  
等閒相引作輕陰

白雲曾與閒人約爲怪貪忙久不來飛過孤亭訪消息  
也還遮莫未能回

和人觀木戲

百尺高竿巧捷身  
竿頭立定鬪尖新  
更呈失脚翻身樣  
平地旁觀亦損神



書滴水集後

長安李履中世以儒業稱未冠取國學解自以年少十年不試於禮部刻苦於學元豐二年始於時邦美榜登進士第公既博極羣書士大夫皆勉就制舉公謂任途捷徑知義守分者不與焉可也遺書彭元發徃復論難終不易其操及從仕干祿不以貧爲身謀當是時朝廷方欲經理靈夏時宰誘公以侍從而薦於上公毅然不就對故作兵餽行有不知何人畫此計徒困生靈甚非

策之句後涇原路乞造戰艦五百艘姚麟乞造戰車三百輛公時爲熙河漕被旨專監眎奏以謂實同兒戲辨數利害力詆其非是上察知其言忠遂罷其役其爲王翦將軍廟記云自昔凡有深謀遠慮老成審的者於天下事不肯輕動新進後生不思遠圖易其事其不敗者鮮矣蓋譏生事於西戎者公以通儒喜論事而每執正議不爲勢利之所移奪居官行已成取則於六經而尤邃於易至於星歷五行小說百家罔不研精求是故時

輩多質疑問難當代名士如張芸叟李成季王子發先  
伯祖穆父皆文字詩友也予嘗謂古之學者本志於道  
而後世假以爲利民之資其不爲利動者曾無幾何孔  
子曰古之學者爲己今之學者爲人至若履中亦可以  
追配古之君子矣其孫龜年龜朋出遺集四十卷予熟  
讀其文想見其風采姑摭其大槩而志之公諱復以字  
行關中關中稱名儒者必曰履中也官至中大夫集英  
殿修撰其行事之詳備見于史譜云乾道癸巳歲閏正

月辛丑吳越錢端禮書

象祖嘗讀樂靜先生詩云結交賴有紫髯翁鶴骨嶄嶄  
爛修目五言長城屹千丈萬卷書樓聊一讀蓋言滴水  
先生也曩先祖觀文見先生之集嘗按其大槩而志之  
又爲之說曰予讀歐陽文忠公集古錄見由漢唐以來  
士之有德行文章功名事業載於金石不見於傳記不  
可勝言後世泯絕無聞者多矣豈真無聞耶蓋繫乎幸  
不幸也如滴水先生其學術淵源其文章爾雅其議論

醇正烏可以不傳於世昔揚子雲作太玄嚴尤謂桓譚  
曰子嘗稱揚雄書豈能傳於後世乎譚曰必傳顧君與  
譚不及見也後四十餘年法言大行則信知天下自有  
公論傳不傳時有隱顯爾先祖帥會稽時欲刊先生之  
集期以行遠未幾奉祠歸不克就象祖今於上饒郡齋  
刊之從先志也淳熙癸卯十月既望郡守錢象祖書

題滴水集後

滴水先生道可宗清詩華藻亦云工欲知派別從何出

具載邦君大集中徐衡仲

